

आकाशवाणी

खास-खास खबरां:-

- राष्ट्रमंडल दे अध्यक्षें ते पीठासीन अधिकारियें दा 28मां सम्मेलन CSPOC अज्जै थमां नमीं दिल्ली च शुरु होग।
- विदेश मंत्री एस. जयशंकर होरें अमरीका दे विदेश मंत्री मार्को रुबियो हुंदे कन्नै फोन पर गल्लबात कीती।
- अमरीका दे राष्ट्रपति डोनाल्ड ट्रम्प होरें ईरान गी चेतावनी दिती ऐ जे जेकर ओह प्रदर्शनकारियें गी फांसी देगंन तां अमरीका सख्ती नै कारवाई करोग।
- अमरीका नै मुस्लिम Brotherhood दी मध्य पूर्वी त्रै शाखाएं गी आतंकवादी संगठन घोषिता कीता ऐ।
- “मकर संक्राति” दा त्योहार अज्ज मुख्य भरै दे बक्ख-बक्ख हिस्सें च मनाया जा रदा ऐ।
- ते मर्दे दे क्रिकेट च भारत ते न्यूजीलैंड बश्कार 3 मैचें दी इक-रोजा श्रृंखला दा दुआ मैच राजकोट च खेडेया जाग।

<><><><><><>

CSPOC - Conference

राष्ट्रमंडल दे अध्यक्षें ते पीठासीन अधिकारियें दा 28मां सम्मेलन- सी.एस.पी.ओ.सी. अज्ज सोयां नमी दिल्ली च शुरु होग। 3 रोजा इस सम्मेलन च 60 सोयां मते राष्ट्रमंडल देशें ते अर्ध-स्वायत्त संसदें दे अध्यक्ष ते पीठासीन अधिकारी हिस्सा लैडन। इसदा मकसद संसदीय लोकतंत्र दे बक्ख बक्ख स्वरूपें दे बारे च ज्ञान ते समझ गी बढ़ावा देना ते संसदीय संस्थाएं दा विकास करना ऐ। लोकसभा अध्यक्ष ओम बिरला इस सम्मेलन दे अध्यक्ष न। सम्मेलन दे अज्ज पैहले दिन स्थायी समिति दी बैठक होग। 28में सम्मेलन दे अध्यक्ष दे तौर पर बिरला होर इसदी स्थायी समिति दी बैठक दी अध्यक्षता करेडन। प्रधानमंत्री नरेंद्र मोदी कल संविधान सदन दे ऐतिहासिक केंद्रीय हॉल च सम्मेलन दा उद्घाटन करडन। मोदी राष्ट्रमंडल ते स्वायत्त संसदें दे अध्यक्षें ते पीठासीन अधिकारियें कन्नै अ-नौपचारिक गल्लबात बी करडन।

सम्मेलन दौरान संसद च कृत्रिम बुद्धिमत्ता- ए.आई. दे उपयोग, प्रतिभागिये बश्कार सर्वोत्तम प्रथाएं ते नमें विचारें गी साझा करने, सांसदें पर सोशल मीडिया दे असर, संसद दे बारे च जनता दी समझ गी बदाने ते सांसदें दी सुरक्षा, सेहत ते कल्याण सने बक्ख बक्ख विशे पर सत्र आयोजित कीते जाडन। एह ऐतिहासिक आयोजन भारत दी लोकतांत्रिक ते संसदीय यात्रा च इक मील दा पत्थर ऐ जेडा हिस्सेदारी ते गौरवपूर्ण क्षण दा प्रतीक ऐ।

<><><><><><>

Jaishankar Rubio Talks

विदेश मंत्री एस जयशंकर होरें कल अमरीका दे विदेश मंत्री मार्को रुबियो हुन्दे कन्ने फोन पर गल्लबात कीती। जिसदे च व्यापार, महत्वपूर्ण खनिजें, परमाणु ऊर्जा ते रक्षा क्षेत्रें च सहयोग पर ध्यान केंद्रित कीता गया। जयशंकर ते रुबियो हुन्दे बश्कार एह गल्लबात नमे नियुक्त अमरीकी राजदूत सर्जियो गोर हुन्दे उस बयान दे इक दिन मगरा होई, जिसदे च उने आक्खेआ हा जे व्यापार मुद्दे पर दोने पक्खें बश्कार गल्लबात होग। जयशंकर होरें आक्खेआ जे रुबियो हुन्दे कन्ने खरी गल्लबात होई ते ओह संपर्क च रौहने पर सहमत होए न। सोशल मीडिया पर इक पोस्ट च जयशंकर होरें आक्खेआ जे उने अमरीका दे विदेश मंत्री रुबियो हुन्दे कन्ने खरी गल्लबात पूरी कीती। दोनें व्यापार, महत्वपूर्ण खनिजें, परमाणु सहयोग, रक्षा ते ऊर्जा पर चर्चा कीती। उने आक्खेआ जे दवै पक्ख इन्दे अलावा होरने मुद्दें पर संपर्क च रौहने पर बी सहमत होए न।

<><><><><><>

French Advisor

फ्रांस दे राष्ट्रपति इमैनुएल मैक्रों हुन्दे राजनायिक सलाहकार इमैनुएल बोने होरें कल नमी दिल्ली च प्रधानमंत्री नरेन्द्र मोदी हुन्दे कन्ने मलाटी कीती। सोशल मीडिया पोस्ट च मोदी होरें आक्खेआ जे उने मजबूत ते भरोसेमंद भारत-फ्रांस रणनीतिक साझेदारी पर चर्चा कीती। प्रधानमंत्री होरें खुशी जताई जे भारत ते फ्रांस बश्करा नमियां काहडा, प्रौद्योगिकी ते शिक्षा दे क्षेत्र च सहयोग बदा र दा ऐ, खास करी ऐसे समे च जिसलै भारत-फ्रांस नवाचार वरा मना र दे न। मोदी ते बोने होरें मुख्क्ष क्षेत्रीय ते वैश्विक मुद्दें पर विचारें दा आदान-प्रदान बी कीता। मोदी होरें आक्खेआ जे ओह भारत च बडी तौलै फ्रांस दे राष्ट्रपति इमैनुएल मैक्रों हुन्दा सोआगत करने आस्तैलिए उत्सुक हैं।

<><><><><><>

Rajnath Veterans

रक्षा मंत्री राजनाथ सिंह होर अज्ज नमी दिल्ली च 10में सशस्त्र बल साबका सैनिक दिवस समारोह च शामिल होंडन। सशस्त्र बल साबका सैनिक दिवस भारतीय सेना दे पैहले कमांडर-इन-चीफ फील्ड मार्शल के.एम करिय्यपा हुन्दी विरासत ते सेवा दे चेतें च हर बरे 14 जनवरी गी मनाया जन्दा ऐ। फील्ड मार्शल के.एम करिय्यपा अज्जे दे गै दिन 1953 च पिनशनी होए हे। फील्ड मार्शल के.एम करिय्यपा भारतीय सैन्य इतिहास दे महान लोकें चा इक हे। उने सेवा, अनुशासन ते देशभक्ति दी मजबूत विरासत दी नीह रक्खी। साबका सैनिक दिवस, राज्यें ते केन्द्र शासित प्रदेशें दे 34 राज्य सैनिक बोर्ड ते चार सौ 34 जिला सैनिक बोर्ड आस्सेआ मुख्य भरें च मनाया जाग।

<><><><><><>

Trump -Iran

अमरीका दे राष्ट्रपति डॉनल्ड ट्रम्प होरें आक्खेआ ऐ जे जेकर ईरान दे अधिकारी देश च जारी अशांति दे चलदे प्रदर्शनकारियें गी फांसी देंडन तां अमरीका सख्ती कन्नै परता देग। ते सखत कार्रवाई करौग। एह गल्ल उने इक टीवी चैनल गी दिते गेदे इक इन्टरवेयू च आक्खी। इसदे थ्वा पैहले इक सोशल मीडिया पोस्ट च ट्रम्प नै ईरान दे प्रदर्शनकारियें दा समर्थन जतान्दे होई आक्खेआ हा जे 'मदद रास्ते च ऐ'। उने आक्खेआ जे ईरान च खूनखराबे दा स्तर अजे तगर साफ नेई ऐ। ओह इस स्थिति पर जानकारी गी बलगा र दे न। ट्रम्प होरें पैहले चेतावनी दिती ही जे जेकर प्रदर्शनकारी मारे जन्दे न ता अमरीका दखल देग। अभियोजकें आस्सेआ किश बंदियें गी मौत दी सजा देने दे आरोपें दा सामना करने दी गल्ल आक्खने मगरा ईरान इस अशांति गी दबाने आसतें मौत दी सजा दा इस्तेमाल करी सकदा ऐ। इस करी चिन्ता बदी गई ऐ। ईरान दे मानवाधिकार संगठनें तेहरान दे इक बड़्हे शैहर कराज च पिच्छले हफते गिरफ्तार कीते गए 26 वरे इरफान सोलतानी दे मामले दा जिक्र कीता ऐ। उसदे परोआर आहले दस्सेआ जे इरफान सोलतानी गी पैहले गै मौत दी सजा सुनाई जाई चुकी दी ऐ।

<><><><><><>

US -Muslim

अमरीका नै मुस्लिम ब्रदरहुड दी मध्य-पूर्वी त्रै शाखाएं गी आतंकवादी संगठन घोषित करिए उन्दे पर ते उन्दे सदस्यें पर प्रतिबंध लाई दिता ऐ। खजाना ते विदेश संगठनें इने संगठनें गी अमरीका दे हितें आस्तै खतरा दस्सेदे होई कल राती लेबनान, जॉर्डन ते मिस्र दी शाखाएं खिलाफ कार्रवाई दी घोषणा कीती।

विदेश विभाग नै लेबनानी शाखा गी विदेशी आतंकवादी संगठन घोषित कीता ऐ जेडा सब्बने थ्वा गंभीर श्रेणी दा ऐ, जिसदे तैहत समूह गी भौतिक सहायता प्रदान करना अपराध ऐ। जॉर्डन ते मिस्र दी शाखाएं गी माली मैहकमे नै हमास गी समर्थन देने आस्तै खआस तौर पर नामित वैश्विक आतंकवादी घोषित कीता ऐ। इक बयान च, विदेश मंत्री मार्को रुबियो होरें आक्खेआ जे एह घोषणा मुस्लिम ब्रदरहुड दी शाखाएं आस्सेआ हिंसा ते अ-स्थिरता फैलाने दे लगातार जतने दी शुरुआती कार्रवाई गी दर्शान्दी ऐ। अमरीका मुस्लिम ब्रदरहुड दी इने शाखाएं गी आतंकवाद च शामिल होने या उसदा समर्थन करने दे संसाधनें सोयां वंचित करने आस्तै सारे उपलब्ध साधनें दा इस्तेमाल करौंग। पिछले बरे राष्ट्रपति ट्रंप हुन्दे इक कार्यकारी आदेश तैहत रुबियो ते वित्त मंत्री स्कॉट बेसेंट गी प्रतिबंध लाने दा सबने थ्वा बेहतर तरीका निर्धारित करने दी जिम्मेदारी सौपी गई ही। एह प्रतिबंध उने संगठनें पर लाने लेई आक्खेआ गेआ जेडे हिंसा ते अ-स्थिरता अभियानें च शामिल न या उनदा समर्थन करदे न ते कन्ने गै अमरीकी क्षेत्रें आस्तै नुकसानदेह न।

<><><><><><>

Maker Sankranti

मुख्य भरै च अज्ज मकर संक्रांति दा त्योहार धूम-धाम कन्ने मनाया जा र दा ऐ। मकर संक्रांति सर्दियें दे खतम होने ते लम्मे दिनें दी शुरुआत दा प्रतीक ऐ। देशै दे बक्ख बक्ख हिस्सें च इस त्योहार गी बक्खरे बक्खरे नाएं कन्ने मनानेआ जन्दा ऐ। तमिलनाडु च इसी पोंगल, गुजरात च उत्तरायण, असम च भोगाली बिहू ते पश्चिम बंगाल च इसी पौष संक्रांति आक्खेदे न।

<><><><><><>

Uttarayan- HM

उत्तरायन उत्सव अज्ज गुजरात च पूरे उत्साह ते जोशोखरोश कन्ने मनाया जा र दा ऐ। गुजरात च एह उत्सव रंग-बिरंगी गुड्डियां डोआरिए मनाया जन्दा ऐ। उत्तरायन दे मौके पर केंद्रीय गृहमंत्री अमित शाह गुजरात दी 3 दिन दी यात्रा पर न। ओह अहमदाबाद च ऐतिहासिक श्री जगन्नाथ मंदिर दा दर्शन करडन। श्री शाह होर मगरा पतंग उत्सव मनाने आस्तै अपने निर्वाचन क्षेत्र दे अन्दर बक्ख बक्ख थाहरें पर नागरिकें ते पार्टी कार्यकर्ताएं कन्ने शामिल हौडन।

करुणा अभियान दे हिस्से दे तौर पर राज्य सरकार नै मकर संक्रांति दे पैहले घायल पक्खरुएं दा इलाज करने आस्तै 8 हजार 5 सौ कर्मियें गी तैनात कीता ऐ। राज्य च बक्ख बक्ख थाहरें पर आयोजित अंतरराष्ट्रीय पतंग उत्सव च हिस्सा लैने आस्तै दुनिया भरै थवा प्रतिभागी गुजरात यात्रा पर औन्दे न।

<><><><><><>

Men Cricket

मर्दे दे क्रिकेट च भारत ते न्यूजीलैंड बश्कार 3 मैचें दी इक रोजा श्रृंखला दा दूआ मैच अज्ज राजकोट दे निरंजन शाह स्टेडियम च खेडेआ जाग। एह मैच दोपहरी डे॥ बजे शुरु होग। भारतीय टीम नै वडोदरा च एतवारें पैहले मैच गी चार विकेट कन्नै जितिए श्रृंखला च 1-0 दी बढ़त बनाई लैती ऐ। श्रृंखला दा त्रिया ते अखीरला मैच एतवारें इंदौर च खेडेआ जाग।

<><><><><><>

WPL

महिला प्रीमियर लीग क्रिकेट च मुंबई इंडियंस नै कल राती नवी मुंबई दे डॉ. डी.वाई. पाटिल स्पोर्ट्स अकादमी च गुजरात जायंट्स गी 7 विकेट कन्नै हराया। गुजरात जायंट्स आस्सेआ दिते गेदे इक सौ 93 रन दे लक्ष्य दे जवाब च मुंबई इंडियंस नै चार गेंदा बाकी रौहन्दे 3 विकेट दे नुकसान पर लक्ष्य गी हासिल करी लैता। कप्तान हरमन प्रीत कौर नै 43 गेंद च नाबाद 71 रन बनाए।हरमनप्रीत कौर गी प्लेयर ऑफ द मैच घोषित कीता गया।

<><><><><><>

Army Chief

सेना अध्यक्ष जनरल उपेन्द्र द्दिवेदी होंरें ज़ोर देइयै आखेया ऐ जे जम्मू-कश्मीर च शक्सगाम घाटी गी लेइयै 1963 च चीन ते पाकिस्तान बश्कार होए दा समझौता गैर-कनूनी ऐ। इस घाटी बारै भारत दे रौंस गी स्पष्ट करदे होई सेना अध्यक्ष होंरें आखेया जे भारत शक्सगाम घाटी च कुसै बी गतिविधि दी इजाज़त नैई दिंदा ऐ।

जनरल द्विवेदी हों एह गल्ल शक्सगाम घाटी बारे चीन दे बदेश मंत्रालय दे प्रवक्ता दी टिप्पणी बारे मीडिया आसेया पुच्छे गेदे इक सोआल दा परता दिंदे होई आखी। सेना अध्यक्ष होर कल नमीं दिल्ली च इक संवाददाता सम्मेलन गी सम्बोधित करा रदे हे।

<><><><><><>